

2024 年第六屆鷗社藝苑指定詩

參賽者限選擇(a)古典詩文人調組(b)社青組詩詞新唱組(c)校園組詩詞新唱組其中一組報名。2024 年第六屆鷗社藝苑指定詩以嘉義老醫館及鷗社多位成員參加台灣文化協會嘉義支部之詩作為主，如弘仁醫院方輝龍醫師、長春醫院林淇漳醫師、英安堂陳宗惠醫師、振山眼科劉傳來醫師、上池醫院黃文陶醫學博士、諸峰醫院張李德和醫師對嘉義景點或事蹟進行創作詩，如壺仙花果園、樣圃故址、鷗社藝苑發刊、祝鷗社顧問黃文陶醫學博士還曆並建基開業、臺灣醫師公會成立、花品、阿里山鐵路..為題，參賽者需在網路報名中選擇下列鷗社藝苑指定詩一首，與自創詩為題一首報名參賽。

1 遊壺仙花果園 方輝龍(梅魂) 《鷗社藝苑三集[1954]》3 頁

樹木功成已十年。滿園幽雅拜壺仙。識名花果累千樹。遺愛緬懷是睡蓮。

2 歡迎鷗社諸君蒞花果園 次社友賴巽章原韻 方輝龍(梅魂) 《鷗社藝苑三集[1954]》5 頁

志機鷗鷺盡登堂。鉢擊詩催景未荒。一角諸羅別天地。好花佳果滿園香。

3 遊壺仙花果園 李德和(連玉) 《鷗社藝苑三集[1954]》2 頁

壺裡風光別有天。香吹曲沼共留連。向榮花果猶如昔。不見豪吟老大仙。

4 遊壺仙花果園 黃文陶(竹崖) 《鷗社藝苑三集[1954]》2 頁

花果名園到幾回。重來依約值蓮開。壺仙偉範欣光大。賢裔門徒盡俊才。

5 遊壺仙花果園 賴惠川(號頤園，別署「悶紅老人」) 《鷗社藝苑三集[1954]》2 頁

名花滿徑清芬逗。佳果盈枝碩德彰。繼志有兒存雅範。玲瓏碣石屹經堂。

6 遊壺仙花果園 黃水文(梅溪) 《鷗社藝苑三集[1954]》224 頁

滿園花果鬱青葱。壺裡乾坤淑氣融。屈指道山人去後。豐碑依舊屹春風。

7 遊樣圃故址 方輝龍(梅魂) 《鷗社藝苑三集[1954]》5 頁

政簡刑清遺愛深。虛堂古樣自成陰。興亡莫問前朝事。故址如今種杏林。

8 遊樣圃故址 黃文陶(竹崖) 《鷗社藝苑三集[1954]》4 頁

名園故址舊衙東。香樣重栽計幾叢。騷客漫輕無雅緻。夏深自可臥薰風。

9 遊樣圃故址 王甘棠(無涯) 《鷗社藝苑三集[1954]》4 頁

樣圃蒼茫逐逝波。惹人空憶古諸羅。靜香院落春無限。勝日攜筇此地過。

- 10 遊關仔嶺 方輝龍(梅魂) 《鷗社藝苑次集[1953]》 97 頁
湧擠人群慎轉舵。計程關嶺路低高。死生盡委司車手。命抵輕鴻只一毛。
- 11 遊關仔嶺 黃水文(梅溪) 《鷗社藝苑次集[1953]》 124 頁
空濛曙色釀春陰。孤館人來一洗心。水火同源孚既濟。好將既濟及黎黔。
- 12 敬祝鷗社藝苑發刊 謝雪漁 《鷗社藝苑初集[1951]》 14 頁
發刊藝苑氣淵然。鷗社尋盟三十年。鯤海網珊添色彩。羅山織錦結因緣。
別開文獻才無敵。振起風騷筆有權。翹望薇垣光爛熳。雲蒸霞蔚麗南天。
- 13 創刊鷗社藝苑步子清宗兄寄懷韻 賴柏舟 《鷗社藝苑初集[1951]》 19 頁
記得詩星萃滿城。前塵如夢歲頻更。風騷久沐新文化。壇坫重聞舊鉢聲。
卅載閒鷗尋逸侶。一編殘蠹愧高評。稻江明月羅山雨。兩地長懷此日盟。
- 14 祝鷗社顧問黃文陶醫學博士還曆並建基開業二十一年 方輝龍(梅魂)
《鷗社藝苑三集[1954]》 2 頁
樣圃懸壺不憚煩。壽登甲子數新翻。功留醫界千秋仰。名重騷壇一代尊。
濟世心情深日月。超人氣節貫乾坤。劇憐活國同良相。病起諸羅待復原。
- 15 祝鷗社顧問黃文陶醫學博士還曆並建基開業二十一年 王甘棠
《鷗社藝苑三集[1954]》 1 頁
杏苑栖栖二十秋。胸懷磊落羨無儔。杖鄉都道君強項。愛國人推老硬頭。
豈獨岐黃堪濟困。生成坦白喜交遊。以文會友逢今日。祝嘏筵開互唱酬。
- 16 祝鷗社顧問黃文陶醫學博士還曆並建基開業二十一年 李德和《鷗社藝苑三集
[1954]》 1 頁
廿載羅山德業隆。筵開華甲樂融融。上池澤被桃城草。鷗社詩揚樣圃風。
愛國丹心逾杜老。為公皓首勝坡翁。親仁曠逸宜多壽。睦族還欽唱大同。
- 17 甲午年端月六日還曆並醫院開業廿一年紀念日賦呈鷗社諸先生斧正
黃文陶(竹崖) 《鷗社藝苑三集[1954]》 1 頁
一週甲子正春天。巧值懸壺廿一年。馬日又逢添馬齒。桃城喜遇醉桃筵。
自慚濟世無奇術。深盼匡時有後賢。雅會莫嫌樽酒薄。人生能得幾陶然。
- 18 喜臺灣醫師公會成立 黃文陶(竹崖) 《鷗社藝苑四集[1955]》 93 頁
八年抗戰告功成。且喜醫人亦結盟。號召刀圭酬盛世。群期方藥拯蒼生。
為私此際宜拋卻。報國於今合勵精。佇看自由民主立。一家五族共存榮。

19 鷗社秋季大會席上賦呈諸君子 黃文陶(竹崖) 《鷗社藝苑初集[1951]》 70 頁
平分秋色乍涼天。萬里無雲夜色妍。滿座嘉賓皆碩士。一庭明月伴詩仙。
鉢聲響徹傳佳句。桂子香飄燦綺筵。勝會恭逢深致祝。揚風扞雅繼年年。

20 辛卯秋季鷗社大會有感賦呈席上諸君子
七言絕句 吳百樓 《鷗社藝苑初集[1951]》 70 頁
明月蓬萊淺水灣。苔岑卅載鷗鷗閑。忘機尚有侶多少。海嶠狂波浪撼山。

21 待中秋 方輝龍(梅魂) 《鷗社藝苑三集[1954]》 34 頁
霓裳曲擬聽從容。佳節將臨喜在胸。天上姮娥應有感。光明期待不辭慵。

22 立秋(寒蟬鳴)老蟬 方輝龍(梅魂) 《鷗社藝苑初集[1951]》 150 頁
經霜抱樹尚吟風。秋老空山夕照紅。憐汝無人信高潔。龍鍾哀咽漢宮中。

23 秋夜聞蛩 方輝龍(梅魂) 《鷗社藝苑三集[1954]》 46 頁
秋深如訴可憐生。入耳啾啾月正明。天地無情誰念汝。微蟲何苦徹宵鳴。

24 中秋對月懷人 朱芾亭 《鷗社藝苑初集[1951]》 137 頁
人不團圓月竟圓。相思南北夢魂牽。清輝顧影增離恨。濁酒澆愁憶少年。
銀漢橫斜迴兔魄。彩雲消息渺魚牋。知君未減淒涼意。忍抱寒衾獨自眠。

25 中秋述懷步芾亭兄韻呈鷗社諸吟友 黃鑑塘 《鷗社藝苑初集[1951]》 70 頁
中秋空對月團圓。觸我閑愁萬縷牽。父愛失嚴憐昔日。子離責善嘆今年。
花花世事昏迷眼。草草人情薄似牋。如此江山如此夕。未容欹枕作高眠。

26 寄方梅魂 王養源 《鷗社藝苑三集[1954]》 39 頁
聞名恨未得君親。吐屬沉雄仰入神。大度仁心延國脈。安閒鷗夢寄吟身。
南枝不屈頻窺宋。東閣爭妍易感甄。遙憶臥龍騰起躍。詩情占盡遯山春。

27 步王養源韻 方輝龍(梅魂) 《鷗社藝苑三集[1954]》 40 頁
百事勞勞每自親。漸知衰退老精神。繁華過眼都成夢。名利無心易守身。
友得高人緣不淺。士真知己義應甄。東台桃李羅山杏。開到東風盡是春。

28 菊枕 方輝龍(梅魂) 《鷗社藝苑三集[1954]》 63 頁
一枕西風睡又醒。秋英采采易忘形。不須更向盧生借。蝶化淵明夢亦馨。

29 蘆花 方輝龍(梅魂) 《鷗社藝苑次集[1953]》 37 頁
村烟人語亂寒潭。兩岸花花鎖翠嵐。自笑盈頭如雪白。隔江秋色最難堪。

30 題襟亭賞百合花 方輝龍(梅魂) 《鷗社藝苑次集[1953]》 137 頁

小亭雨過淡梳妝。多士題襟一夜忙。花氣不隨風信減。四垂如雪入簾香。

31 品花 林玉山 《鷗社藝苑四集[1955]》 91 頁

爛熳群芳露色濃。世人肉眼喜嬌容。姚紅魏紫余嫌俗。獨愛梅花是正宗。

32 寄懷林臥雲先生 李笑林 《鷗社藝苑次集[1953]》 132 頁

風雨關心十字樓。桃城三月似深秋。人經浩劫身仍健。棋到沉酣巧愈求。
一枕機聲驚夜夢。漫天烽火起邊愁。干戈未息音書斷。欲訊平安不自由。

33 和臥雲詞長古稀自壽原玉 黃竹崖 《鷗社藝苑四集[1955]》 105 頁

回憶追陪翰墨筵。光陰迅速廿餘年。行醫久仰聲名著。樂道常欽氣節堅。
南極星輝齊致頌。中庭蘭秀更堪憐。如公福澤應無限。七十高齡厚得天。

34 和臥雲詞長古稀自壽原玉 黃文陶(竹崖) 《鷗社藝苑四集[1955]》 105 頁

文章道義兩堪矜。好似高懸太乙鐙。光被台瀛頑魯化。名聞中外士儒稱。
承歡且喜多奇鳳。處世何求笑大鵬。祝嘏今宵春不夜。紅男綠女慶如恆。

35 阿里山 陳韻絃 《鷗社藝苑三集[1954]》 22 頁

螺旋軌道過峰巒。削壁懸崖到處看。忽覺車遊銀浪上。幾疑身渡白雲端。
誰知阿里三秋冷。絕勝峨眉六月寒。極目下方欄外望。搖山撼樹起波瀾。

36 阿里山 黃鑑塘 《鷗社藝苑三集[1954]》 22 頁

螺旋鐵軌繞高山。縹渺御風霄漢間。霧雨迷濛十字路。雲濤洶湧八通關。
凌空老幹千年檜。幽谷盤根一葉蘭。到此渾疑在天上。幾忘下界有塵寰。

37 阿里山 施正明 《鷗社藝苑三集[1954]》 22 頁

密林鬱勃玉華姿。雲海浮沉蘭艇移。檜木擎天山作柱。櫻花繡地雨為絲。
三峰皎潔含煙媚。五彩迷濛出岫奇。梁棟時乖根托處。廟廊取器豈無期。

38 阿里山 簡竹村 《鷗社藝苑三集[1954]》 23 頁

名高阿里冠全臺。鐵軌盤旋上碧嵬。斫盡良材山露骨。衝奔濁世水成災。
滿林黃檜餘神木。幾樹紅櫻剩劫灰。濟世要求梁與棟。猶須千載苦栽培。

39 端午即事 黃文陶(竹崖) 《鷗社藝苑三集[1954]》 9 頁

對酒當年興未賒。綠絲繫臂競豪華。文明畢竟能移俗。今日追風剩幾家。

- 40 鄭成功七言絕句 黃文陶(竹崖) 《鷗社藝苑三集[1954]》9 頁
屯兵隱忍據澎台。報復朱明念不灰。誰識興亡天數定。鹿門秋水有餘哀。
- 41 題香妃遺像 張李德和 《鷗社藝苑四集[1955]》 24 頁
亡國哀情祇自羞。香身端不為君留。願將俠骨隨流水。大義轟然耀九洲。
- 42 監察縣議選舉即事 黃文陶(竹崖) 《鷗社藝苑四集[1955]》 74 頁
十里鄉村半面沙。驅車監察日西斜。復興國族需賢急。圈選希防一念差。
- 43 古戰場 黃啟棠《鷗社藝苑四集[1955]》 51 頁
陣亡士卒顯英靈。羊角旋號不忍聽。片片金鎧憑散亂。纍纍白骨任飄零。
而今遍野飛燐燂。往昔盈郊濺血腥。畢竟功名歸將帥。荒涼舊壘倩誰銘。
- 44 黃啟棠《鷗社藝苑四集[1955]》 66 頁
何時煮酒話平生。好見高吟咳唾成。昔倚芸窗同聚首。今驅墨騎共尋盟。
漫將老信新愁引。應續童年舊友情。待得東山歸且隱。騷壇逐鹿四方征。
- 45 早春 黃啟棠《鷗社藝苑四集[1955]》 78 頁
一榜梅花獨占先。青舒柳眼盼晴天。微寒未退韶光淺。薄暖初回淑氣延。
粉蝶試飛憐翅慣。黃鶯學轉待喬遷。芳菲漸入詩人景。善為青陽詠一篇。